

度

支

奏

議

度支奏議目錄

新餉司十一卷

議請加給援兵鹽菜疏

題覆酌給莊浪土兵原糧疏

題覆王岡卿催解廣東錢糧疏

題報解發薊鎮修工糧餉疏

題叅解官任意稽遲疏

題覆楚省洪撫臺并唐常卿催解錢糧疏

題覆募兵開銷東省新餉疏

題覆浙蜀援兵糧餉疏

題覆邊工餉司包鳳起條議疏

題覆薊鎮援兵本色水陸轉運疏

覆督餉御史題襍項載入考成疏

題覆呂罔鄉催解山東錢糧疏

題叅霸密河南山東保河六府買豆愆期疏

題催省直新餉完欠疏

度支奏議卷之十一

太子少保戶部尚書淄青畢自嚴視草

議請加給援兵鹽菜疏

題爲議請加給援兵鹽菜以示畫一事專理新餉  
山東清吏司案呈奉本部送准兵部咨該兵部  
題開陝西宣府河南各兵差覺可觀宜留備守  
衛而河南領兵遊擊蔡忠頗有調度相應合爲  
一營着實團練念其久戍偏留量加鹽菜一分  
以爲涼棚水瓜之用是卽

皇上撫恤之深仁也等因奉

聖旨據奏宣兵見在城守廣兵乃令隨宣通兵方以  
減募浙兵又伏發防是否長便還着另議餘如議  
分別去留仍嚴飭將領去的途次安靜留的加意  
團操不得少有縱弛欽此又該本部覆奉

聖旨據奏浙廣兵分置既經審酌仍依議旨內伏字  
挿字錯寫改正行欽此欽遵移咨到部送司相應  
具覆案呈到部該臣等看得兵貴精悍烏合之  
旅不足以壯敵愾餉貴優厚數米而炊不足以

振投袂自有虜警以來入衛不啻如林而塗人  
象馬坐糜

公帑臣心痛之而不敢越俎問也今樞臣於城下  
之兵擇其不堪者遣歸而留其精健者以備聲  
援真可謂洞悉機宜矣乃念其靡室靡家之苦  
而溥以投醪挾纊之仁於鹽菜三分之外量加  
一分爲冰瓜之賞奉有

明旨 在兵部索以如數給發 臣部當極窘極迫之時  
而不敢爭執者 總以我公曰 歸我心 西悲此輩

亦幾無固志矣於體卹犒賞之中寓鼓舞聯屬  
之意俾緩急恃以無恐是或一道也夫樞臣之  
爲

都門援兵計者可謂曲體矣而遵勦防守之援兵  
其勞苦堪憐臣之身雖未之與周旋而臣之心  
實無時無刻而敢忘於懷也勦遵當殘破之後  
四望蕭條食物騰貴宵處於積尸之野枕戈於  
炎暑之地况其間有遣歸者亦有潛逃者將何  
以繫其心而使無異志乎且奴謀叵測秋防儻

始士心解體禦侮何資或比照城下之例將防  
守邊堡各處援兵於七八九十四箇月內量加  
鹽菜銀一分以作秋防之犒賞以示同仁之無  
外或亦

皇上之所不靳也查援兵鹽菜之在剴遵者如關寧  
援兵密雲標兵咫尺故壘月餉豐厚不必議增  
總兵王威之家丁新兵見支月餉於臣部是爲  
行月兼支不必議增援兵之在通津者如浙兵  
閩粵兵居處內地食物價平不必議增至如川



貴兵鎮算兵宣大三秦之兵及團練各兵之未  
支月糧者本處之餉既已涼薄而日日仰給者  
只此三分鹽菜其何能支今議體其情而卹其  
私不得不量爲日增一分至如通昌之新兵創  
永之主客兵各有本等月餉皆不得援之以例  
稍有分別則此輩益有所激發而奮勵矣至於  
米豆草束聞有願領折色者若照時估價自過  
昂稍酌其平卽不願領是在該道酌量各堡價  
值申報督撫詳允務使上不虧公下不虧軍而

中亦可少省脚價之費不者寧與本色以資飽騰則計之得也夫援兵幾四五萬每人一分則一月於額數鹽菜又增一萬四五千兩當此三空四盡庫藏如洗省一分可作一分之實用臣本不敢破例徇人但念此炎暑久戍軍士思歸多一分便作一分之恩膏臣亦何敢膠柱鼓瑟此臣所以再四籌畫而不敢復執一定之例者也臣於此而更有說焉入衛各兵歷戰守者過半載矣其間節曠逝亡者亦豈無之而月月領

餉者卒未見開除幾許稍一清查何難溥惠及  
查京營城守諸軍今僅留四分之一以更番而  
臣部月支鹽菜尚有一萬三千一百餘兩虜氛  
漸遠或宜盡撤寧家而所省者即可供援兵之  
用無煩另爲設處矣夫兵驕將貪清查一字往  
往藉口卽城軍應撤與否各有司存亦非臣所  
敢言然酌盈濟虛移緩救急此又出自

聖裁而非臣愚所擅便者也旣經兵部移咨前來相  
應覆

請恭候

命下臣部移文兵部督撫遵奉施行

崇禎三年七月初三日具

題本月初六日奉

聖旨遵酌援兵勞苦鹽菜依議量加其餘地近餉優  
不得比例仍咨行督撫查報逃亡以清虛冒城守  
營軍應否盡撤兵部酌議具奏欽此

題覆酌給莊浪土兵原糧疏

題為披誠捐貲率衆勤

王永固封疆事專理新餉山東清吏司案呈崇禎二年六月初八日奉本部送戶科抄出陝西莊浪都司魯胤昌奏前事等因六月初六日奉

聖旨魯胤昌五月十五日至都如何不與題給行糧這所奏該部速行的覆欽此欽遵抄出到部奉批移咨兵部及甘肅撫院查議批送到司遵卽呈堂咨會兵部該撫備查魯胤昌所統官兵馬匹

的係若干應否准給行糧料草以便給發酌量  
去後今奉本部送准甘鎮巡撫今戴罪梅之極  
咨稱莊浪協援都司魯胤昌所管土官家丁七  
百名在甘鎮原無議有錢糧今本官統領土官  
家丁一百五十九員名自買戰馬二百餘匹安  
家行糧馬匹草料俱皆本官自行措辦本院前  
後止各賞過銀三兩且路遙七千里鈐束秋毫  
無擾既至

都門例應議給糧料撥發地方以禦秋防等因

據太僕寺少卿管兵部職方清吏司事余大成  
回稱查甘鎮兵馬糧料先經咨會預備外後五  
月二十二日據楊總兵冊開所統官兵共二千  
五百八十四員名馬騾共二千六百一十三匹  
頭俱於十九日到齊其魯胤昌官兵一百五十  
九員名馬二百一十三匹俱在數內原冊見在  
可按業於五月二十三日咨會訖所云該鎮呈  
稱魯胤昌聽候分發各另呈討則當查楊鎮關  
支糧料如足前數卽當扣還胤昌如或所領未

足前數似應貴部補給徂昌也等因又據本  
魯徂昌呈稱本管內丁原有額糧俱在甘肅其  
浪倉京民二運內支給該道兼收官處號領可  
查自卑職抽選應援三年有餘未蒙全給原糧  
今奉

詔入衛蒙

旨分發薊門比照甘肅各營新例懇乞咨行撫院查  
給原糧以贍家屬等情各到部送司相應議覆  
案呈到部該臣等看得土官魯徂昌之率衆勤



王也慷慨捐貲不遠千里其義勇堪嘉且跋涉長途秋毫無犯其紀律亦肅夫計兵授食臣部事也豈其有所靳焉及查魯胤昌所領兵馬卽總兵楊嘉謨所統兵馬內之數也所需糧料草束業於五月二十四日准兵部咨一體派給而胤昌卽就中支過本色米六日共一十五石二斗一升支過豆六日共三十二石二斗二升支過草二次計十一日共一千九百六十九束繼而楊嘉謨兵二千一百七十餘人隨總兵王威出

防薊州王威具揭代為領餉而徯昌之兵尚無  
行色故未與也卽兵部移咨亦云魯徯昌兵馬  
糧料聽其另行呈討逮後徯昌呈領除支過前  
項本色外隨於六月十一日給發官兵廩菜每  
米豆草折銀五百二十兩一錢一分零俱照兵  
部咨從五月十九到京日爲始支至六月終庚  
今奉文赴密鎮爰方啓行又據本官呈討續給  
七月分鹽菜米豆草折銀四百四十二兩八錢  
三分於以裹糗糧而壯行色則各兵於役之需

可無虞匱乏矣第係遐方土兵一旦遠赴勤  
王則當此靡室靡家之際不無將父將母之思身  
戍危疆家無升斗有懷內顧亦可憫也徧昌以  
原食糧餉爲請誠非得已查調募各兵皆有月  
餉而茲百五十名勤

王之土兵何獨不然合無

勅令該撫查其應得原食糧石照例支給以爲各丁  
瞻家之資以昭

朝廷恤軍之意斯亦飭防柔遠之要務也既經題咨

并具呈前來相應覆

請恭候

命下臣部移文該撫并行本官遵奉施行

崇禎三年七月初二日具

題本月初五日奉

聖旨是欽此

題覆王冏卿催解廣東錢糧疏

題爲欽遵

明旨恭報廣東錢糧起解之數併舉急公之臣仰請  
聖裁事專理新餉邊餉司案呈崇禎三年六月初十  
日奉本部送戶科抄出太僕寺少卿王心一題  
前事等因本年六月初八日奉

聖旨這奏廣東解過錢糧已逾催數知道了着該部  
覈冊查收陸問禮前已有旨卽與優叙該部知道  
欽此欽遵抄出到部送司隨該新舊兩司備查

明白相應具覆案呈到部該臣等看得東粵僻處海濱其民俗多蒸蒸好義臨民者一鼓舞而開導之未有不爭先終事者今查該省催餉太僕寺少卿王心一額催新舊餉銀共二十二萬五千二百六十四兩四錢今據該差疏報完解過銀共三十九萬七千二百兩零則該差之董率勤劬與該省撫按及藩司郡邑忠勤體

國槩可知矣臣等謹按冊而細覈之若加派預徵銀委官聞人羣解銀六萬兩湯執綱解銀四萬

兩俱崇禎三年二月內到程元祚解銀六萬二千二百兩汪達解銀六萬八千九百七十八兩六錢二分零俱崇禎二年三月內到共足二十三萬一千一百七十八兩六錢零委卷送至十分他如太倉舊欠銀三千三百一十六兩差官哈提高於崇禎三年二月內到部而三年分舊餉預徵五分應該解銀一千六百五十八兩報稱全解三千三百一十六兩今尚未到鹽課委湯執綱解崇禎元年一萬零二百六十六兩崇禎三

年三月內到汪達解崇禎二年分引餉銀九千  
西程元祚解二年鹽課銀一萬六千七百二十  
六兩九錢七分俱於三年三月內到而沈之璞  
李弘謨共領銀四萬九千七百二十七兩一錢  
零今尚未到又給入衛官兵安家行月糧銀一  
萬四千兩先奉有免銷正額之

旨不准開銷又如襍項冊報李弘謨等領解銀三萬  
九千三十七兩三錢四分零今尚未到又哈提  
高鄭文章湯執綱所解六千八百一十五兩三



錢零俱係二年分之襍項其三年分所當速行  
補解以完原額者也又解西洋大砲到京給過  
銀三千二百二十六兩零奉有

俞旨應准開銷其餘別項開銷銀一萬零五百九十  
兩八錢零如支買木翠則應動工部錢糧如援  
兵安家等項業已題奉

明旨於驛遞節省銀內抵補不准開銷總之該寺疏  
稱報解過三十九萬七千二百有奇之數實解  
到部者二十七萬三千七百一十三兩五錢七

分零而未到并難准開銷者尚有一十二萬三  
千四百八十六兩四錢零該省催數已逾臣部  
何敢得隴望蜀然額例各別該省自不難補缺  
全完相應勒令湊解以濟軍餉者也至若該省  
藩司陸問禮那緩就急拮据靡遑憂

國奉公咄嗟立辦屢邀優叙之

溫綸應入銓衡之首啓然有吏部在非臣部所敢越  
俎矣既經具題前來相應覆

請恭候

命下臣部移文各該衙門遵奉施行

崇禎三年七月初十日具

題本月十三日奉

聖旨王心一催解溢額勤公可嘉准與紀錄優異起  
解未到等項還着查催完日奏結陸問禮已有屢  
旨了該部知道欽此

題報解發薊鎮修工糧餉疏

題爲欽奉

上傳事專理新餉山東清吏司案呈崇禎三年七月初七日奉本部送該

內閣接奉

上傳屢報奴孽憤恨狡謀叵測三協一帶臺哨各軍補設何如守具火器等件添備何如鄉等卽傳兵部速令該督撫自行回奏併傳戶部速運糧餉俱不得少延欽此欽遵傳出到部送司除事關兵部

者聽兵部轉行督撫回

奏外所有糧餉一項相應具覆案呈到部該臣等  
看得奴雖宵遁謀尚叵測設兵修備時不容緩  
誠有如

皇上所軫念者第三協之中惟薊門爲最衝備禦之  
法惟修邊爲最急然所藉以資飽騰而供版築  
者實惟糧餉是賴也是以臣部一聞修築之舉  
卽撥津門漕米五萬石又撥年例邊糧米二萬  
五千石行據天津司道回稱於六月十一等日

盡數開舟發行矣又恐逍遙河澣復差委官孫  
應龍前赴江黃口督押疾行又差官王有功馳  
至各邊堡修築處所查驗解到本色有無多寡  
務取回文報部又恐薊鎮餉司不能兼管復委  
陸運餉司姬文郁帶領車夫往薊協運不足者  
繼以召買近又題差主事包鳳起總理其事是  
本色或不至匱乏者也若折色餉銀從前已給  
者無論矣在班軍除前發過工犒銀二萬兩并  
召買銀二萬兩外今又發銀三萬兩付主事包

鳳起齋帶以行內以二萬兩爲修工班軍鹽菜  
犒賞之用以一萬兩作召買本色之價在官兵  
月餉除六月以前完給外卽七月分餉銀亦於  
七月初二日發銀五萬兩差官陳夢吉等領解  
又於初陸日發銀二萬兩差官曹愈新領解是  
折色或亦不至匱乏者也臣部於薊門糧餉不  
敢一刻少延務期邊軍果腹修築蚤竣用固金  
湯以仰紓

皇上焦勞於萬一此臣之所自矢也所有措發過本

折緣繇理合恭報以慰

聖懷謹具本題

知

崇禎三年七月初八日具

題本月初九日奉

聖旨這發過糧餉數目知道了還須厚儲速運毋致  
呼庚其清冒破嚴剋減責在督撫等官卽浴行申  
飭欽此



題叅解官任意稽遲疏

題爲軍餉萬分緊急解官任意稽遲謹分別查叅  
以懲怠玩以速輸將事新舊兩餉司案呈查得  
應天府崇禎三年三月二十九日批差江寧縣  
縣丞左懋勛領解本年預徵加派銀二萬二千  
六百九十六兩四錢又同日領解本年預徵襍  
項銀二千七百一十六兩九錢零又同日領解  
二年分舊餉銀三千八百五十七兩九錢零又  
領解三年分舊餉銀七千八百二十四兩八錢

安慶府冊報差宿松縣典史師一覽領解三年  
分舊餉銀二千六百六十兩零徽州府於三年  
三月二十一日差休寧縣主簿何士奇領解三  
年分舊餉銀一千七十六兩寧國府冊報於崇  
禎三年五月內差主簿許攢領解三年分預徵  
加派銀八千一百八十九兩三錢又領解預徵  
三年分襍項銀三千二百兩又領解三年分舊  
餉銀六千九兩池州府崇禎三年二月二十日  
差銅陵縣典史許登周領解三年分預徵加派

銀三千六百兩又領解預徵三年分襍項銀四  
千二百四十二兩九錢零又領解二年分舊餉  
銀五千二百三兩九錢又冊報差典史趙守傑  
領解三年分舊餉銀二千一百兩太平府崇禎  
三年四月三十日差常塗縣丞姚元相領解  
三年分預徵加派銀三百五十七兩七錢零又領  
解預徵二年分襍項銀一千九百七十四兩五  
錢又帶解崇禎元年襍項銀六百一十九兩九  
錢零鳳陽府崇禎三年四月二十八日差長淮

衛經歷程一章領解一年分加派銀六千九百  
一十五兩一錢零又領解二年分襍項銀八千  
二百九十七兩四錢零又領解預徵三年分襍  
項銀一萬零七百二十五兩八錢又領解元年  
分舊餉銀二百三十七兩九錢又領解二年分  
舊餉銀三千二百一十八兩三錢又領解二年  
分舊餉銀六千八百九十二兩八錢又冊報崇  
禎二年十二月初四日差懷遠衛經歷張正之  
領解二年分舊餉銀五千七百四十四兩七錢

零浙江布政司冊報本年四月內差斷事查錫  
策領解元二兩年加派銀一萬七千七百五十  
四兩廣東布政司冊報本年三月十三日差官  
李洪謨領解二年分禱項銀二萬七千九百五  
十二兩七錢又三月十九日差官沈之鏞領解  
三年分舊餉銀三千三百一十六兩三錢福建  
省該催餉京卿帥衆疏報本年四月初九日差  
興化府通判儲元基領解加派銀八萬三千八  
百六十三兩五錢零以上各解官起解逾期通

未解到辰下兩庫如洗版築肇興凡一應援兵  
之行糧九邊軍兵之月餉不啻大聲之呼苦無  
點金之術解官延捱若此亦何濟於緩急哉萬  
一患起脫巾伊誰之咎再查和州天啓七年十  
月二十日差役鄭道永張仲信解平糶扣抽等  
銀五百八十八兩屢催不到業該本部於今年  
二月內具錢糧報解逾期疏內查叅備行撫按  
司府查催去後迄今又經半載尚未解報違玩  
已極相應一併查叅案呈到部該臣等看待

因奴孽披猖軍興旁午苦外解之中斷慮供億  
之難支致廛我

皇上焦勞責臣部差官守催

特遣京卿以董其事復定期數以速其來何等鄭重  
何等緊急而承解之員役顧可泄泄從事乎夫  
錢糧之欠在小民者猶曰尚費徵求不能蹴解  
今京卿奉

命督催撫按設誠那辦藩司刻期起解不知費幾許  
經營幾許心力恨不克兼道疾馳以濟急需不

謂解官敢於因循稽延怠玩而漫不經心也非  
嚴加查叅何以警後至謹按道途遐邇月日淺  
深定叅罰之法聲候餉之愆可乎查南直各司  
府以地里考之距京不過二千餘里計程朞月  
可纂何應天府解官左懋勛安慶府解官師一  
覽徽州府解官何士奇寧國府解官許檣池州  
府解官許登周太平府解官姚元相鳳陽府解  
官程一章浙江布政司解官查錫策領解在二  
三等月迄今到期杳然且鳳陽所差懷遠衛經



歷張正之領解舊餉銀兩屈指已七閱月屢催不到更可駭異至如粵閩爲途雖賒卽遲亦不過三月今廣東解官李洪謨福建解官儲元基所解銀兩愆期未到以上各官逍遙途次觀望逗遛旣無纓冠之誼安稱靖獻之忠本當卽行重處第念錢糧在身姑再立限嚴催如浙直之近者限半月閩粵之遠者限一月俟錢糧到部交割明白分別降罰以儆將來倘再逾期容臣徑行吏部從重革職者也至於和州解役鄭道

永張仲信起解已及三年叅查尚無回報則亦  
百八十八兩之金錢明係各役之侵沒矣合行  
該撫按嚴究擬罪追銀補解如再稽遲司府又  
安逃其責乎抑臣更有說焉查從來積弊凡錢  
糧起解有銀未徵到官而先以空文報者亦有  
解官領銀或延捱於本地逗遛於途次而希圖  
作弊抵換銀水者不叅處解官則此輩無所懲  
創不責成驛遞則此輩又多藉口今後起解錢  
糧該省直於批文上酌道里遠近定以限期必

銀出門方行移會

奏報無以空支支吾其經過驛遞支應遲速逐一  
添註勘合以便稽查違者律以失快軍機之罪  
此又轉遲爲速第一急着仰仗

天語申飭而不容緩者也既據兩司案呈前來相應  
題

請恭候

命下臣部移文各該撫按遵奉施行

崇禎三年七月十一日具

題本月十三日奉

聖旨軍餉緊急解官那移作弊日久延挨左懋勛等  
本當卽處旣錢糧未經交卸姑着帶罪依限解完  
奏奪鄭道永等該撫按追究具奏以後解銀就道  
方許報聞經過驛遞詳註應付數目日期以憑挨  
究該衙門知道欽此

題覆楚省洪撫臺并唐常卿催解錢糧疏

題爲恭報起解京卿守催錢糧以濟軍需事專理  
新餉邊餉司案呈崇禎三年五月二十九日奉  
本部送戶科抄出湖廣巡撫洪如鍾題前事等  
因本年五月二十八日奉

聖旨這楚省起解錢糧是否如限如數着部科磨覈  
具奏該部知道欽此又奉本部送戶科抄出太常  
寺少卿唐暉題爲軍需無時不急輸賦無時可  
緩恭報續解銀數少濟目前事等因奉

聖旨這湖廣續解銀數着到日磨覈具奏該部知道  
欽此欽遵通抄到部送司案呈到部該臣等會  
同戶科都給事中玄默逐一磨覈案查先該催  
餉太常寺少卿唐暉疏報楚省起解錢糧日期  
數目奉

聖旨這楚省催解與科疏額數懸殊着并奏內那借  
多開款項通加磨對詳覈明確具奏該部知道欽  
此臣隨督率新舊兩餉司司官磨對明確該省  
實解到部委官章繼華解銀一萬五千三百餘

兩委官毛鑛解銀二萬五十一兩零俱於本年  
四月內到又撥補黃州府屬銀九千三百餘兩  
俱已解到而省直

藩工借支之未明不與焉其餘未到已於本年五  
月初八日具覆奉

聖旨未明欵數還着布政司速查以便催解銀未到  
部報解疏不必先覆割還楚餉唐暉帶催該部俱  
卽飭行欽此隨該臣部備咨該差并移會省直差  
官守催協濟各省直未完

藩工銀兩并割還楚餉及催湖廣開具協濟欠  
前來通行在案今查楚撫洪如鍾疏與前京卿  
唐暉所報數目無異先該臣部覆唐暉疏業詳  
悉入

告又何敢贅瀆以煩

聖聽惟各省直所欠協濟銀兩已經奉

旨行文各該省直催餉差官照數催完又經行文湖  
廣藩司開報欠數至今未報詳確將於何時完  
解所當再一申飭者也又臣前覆唐暉疏時差



官劉懌領解舊餉銀四萬餘兩未到今查前銀  
於五月內到部至於該差續報委官王文耀解  
銀三萬兩據稱五月十八日啓行今於七月內  
亦到所當一併報明者也但啓行之解委固無  
留滯而繼此之督發尤宜迅速合無行文撫按  
并劄該差亟催前項借用

藩工銀兩速爲解發并各省直拖欠確數具報至  
於割還楚餉共三十七萬八千有奇實係關寧  
續命之膏倍切薊門雲霓之望所冀該差務遵

明旨屢速督催前來以資撥濟如各有司怠緩推  
稽未完者聽該差寺臣盡法糾劾以懲怠玩

庶

功令有赫而軍儲克濟矣既經該撫具題前來相  
應覆

請恭候

命下臣部移文各該衙門亟爲申飭施行

崇禎三年七月十一日具

題本月十四日奉

聖旨劉懌王文耀解到銀兩知道了其各省直所欠  
協濟確數該布政司久不具報完解何時并割還  
楚餉着唐暉嚴行督催違玩的指名叅處該衙門  
知道欽此

題覆募兵開銷東省新餉疏

題爲額外措餉原難兵勢聚散宜酌懇摠

睿斷亟議確咨以固東藩以收實着事專理新餉山東清吏司案呈崇禎三年六月初七日奉本部送戶科抄出兵部尚書梁廷棟題覆山東巡撫沈珣題前事等因本年六月初四日奉

聖旨盧洪濛募兵旣已前來着兵部卽與點驗發員鎮練防還須加意簡訓毋得僅取安插充數內有思歸願散的不妨隨宜酌遣東省支動銀應否開

銷着戶部查奏該衙門知道欽此又該福建巡撫  
熊文燦題爲飛調援兵以保

陵京事等因六月初十日奉

聖旨這奏報給過援兵銀數着戶部覈議應否抵銷  
李洵璫規避押兵狂悖蔑紀着革了職該撫按官  
掣解來京究問該部知道欽此又該工部尚書隆  
一級戴罪視事南居益題爲移鎮奉有

明綸兵食全無見在懇乞

聖鑒俯容留用解部新餉以濟入援事覆河南巡撫

郝土膏題前事六月十二日奉

聖旨各省既有額兵卽應原有甲仗何得輒動錢糧  
這奏知道了還着戶部併覆來看欽此欽遵通抄  
到部通送到司查得解部新餉屢奉

明旨不許一槩動支其捐助一節本部於四月二十  
九日題覆應天巡撫曹文衡續解捐助緣繇奉

聖旨以後輸助銀兩還着解部位餉不得在外支銷  
該衙門知道欽此通行遵照在案今山東撫臣沈  
珣福建撫臣熊文燦河南撫臣郝土膏各題

請抵銷前來相應議覆案呈到部該臣等看得新餉  
入額止有此數用於額外卽虧於額內今虞雍  
宵遁防禦修築之役浩費靡所底止惟願此有  
限外解爲沃焦救焚之需少支吾目前於萬一  
而不謂各省之援兵竟供瓜分蠶食之費屢奉  
明旨申飭不啻再三而哀如充耳也今閩省援兵疏  
稱用過安家衣甲銀一萬八千二十三兩二錢  
此係兵工二部事也安家則應驛遞節省銀銷  
筭衣甲則應四司料價銀銷筭

明旨有赫奚待再計其支給過各兵行月餉三萬五千四百六十一兩一錢固臣部事也第設兵即以設餉從來已然何得與行糧一例開銷於別項錢糧哉則所存七年分禱派銀三萬九千餘兩原係臣部那湊暫留者內除行糧用過若干聽其從中冊報開銷餘仍積貯聽候別用至於一萬四千有奇之捐助一併湊解充餉更不待言矣若夫中州地方年來多事設軍旅而修武備誰曰不然或者爲地方防不虞稍爲整禦一



二原非盡補名伍所用錢糧卽從撫屬中稍一  
搜括便可了此似又不必議動新餉以啓劻尤  
而悖

明旨者也至於浙弁盧洪濛以草莽之士談齊魯之  
兵已卜其孟浪行徑矣且經東撫再四裁抑俾  
其安家馬匹而與之行糧似當准其開銷但試  
問盧洪濛所用四千六百八十三兩之金錢果  
能分毫不染而軍沾實惠乎近日各兵抵京且  
部准兵部谷又給月餉半月鹽菜三日矣應俟

抵昌之日查其有無功罪聽候兵部酌議黜陟  
者也既各具題前來相應覆

請恭候

命下臣部移文各該撫按并咨兵部遵奉施行

崇禎三年七月十一日具

題本月十五日奉

聖旨新餉及捐助銀兩不許輕動已有屢旨閩兵及  
盧洪濛募兵行糧依議開銷以後撫臣飭備增兵  
還自行酌處不得擅留額餉致悞軍需欽此

題覆浙蜀援兵糧餉疏

題爲查解空月坐糧暫濟援兵弁陳浙兵勢難久  
缺月餉勢難再解懇乞

聖明勅部另議事專理新餉山東清吏司案呈崇禎  
三年六月十七日奉本部送戶科抄出浙江巡  
撫陸完學題前事等因本年六月十三日奉

聖旨這解過浙兵月餉具見料理知道了奏內所請  
還著該部酌議來說欽此又該浙江巡按御史李  
柄題同前事等因奉

聖旨已有旨了該部知道欽此又該四川巡撫張諭  
題爲西酋撫局偶歇微臣環甲無期事等因六

月十六日奉

聖旨西酋撫局聽督臣議定奏奪川兵行月等餉應  
否從部借支還着該部酌覆欽此欽遵通抄到部  
送司具覆間又奉本部送准兵部咨該天津督  
餉部院翟鳳翀題爲浙兵著勞浙餉難繼仰祈  
勅部從長酌議以安衆心事等因奉

聖旨近日援兵藉口思歸總緣諸將撫恤無方紀律

不肅緩急何賴這浙兵有無勞績應否去留并浙  
餉作何接濟著戶兵工部詳酌速奏欽此欽遵移  
咨到部又據四川監軍道副使劉可訓呈據四  
川統兵總兵鄧懋官副總兵郭起柱鄧玘李國  
選姚化民呈爲乞憐萬里從征比例備達支餉  
以資戰守事內稱據五管甲兵李明法等援兵  
湖廣鎮筭援兵例欲於日支行糧塩菜之外討  
支坐糧六分緣繇該本道劉可訓呈稱合無比  
照密雲遵化兵事例每名於行糧塩菜外給坐

糧五分伏乞本部批示庶便行令四川管餉通判屠隨裕會書武震華於一起官兵支剩餉銀一萬三百五十餘兩內支二十六兩八分五釐給管餉官屠隨裕武震華自崇禎三年六月二十三日日起至七月三十日止廩給紙劄查一起官兵除本道自覈餉糧親丁二十名原未支餉又除陣亡病故兵一百六名不支外實在官兵五千六百三十三員名各支不等自六月二十三日日起至七月二十九日止計三十六日共蘇

支餉銀一萬三百二十六兩四錢五分六釐尚  
存剩餉銀七兩三錢九分八釐給醫生韓生春  
買辦藥料調治病兵外俟支完一總造冊開銷  
等因到部奉批川兵比例多索月餉夫不比某  
薄者而比其厚者人心何厭之有恐後難繼也  
新餉司查議又准兵部咨該薊遼總督張鳳翼  
奏覆錢法侍郎康新民題爲蜀兵露處撫恤宜  
周仰祈速沛

德意以慰人心以預秋防事內覆稱川兵搯菜行糧

俱飭餉司先期給發亦未嘗缺少稽遲副總  
鄧懋官鄧玘郭起柱李國選姚化民可問也俱  
聞其所齎月餉僅至六月而止倘行糧鹽菜未  
足所需又不可不預爲之慮者或扣解於該省  
或借支於部餉均當早爲酌處者也等因七月  
初二日奉

聖旨據奏蜀兵安插始末知道了還著劉可訓加意  
撫輯務使感恩畏法賈勇圖功其行糧鹽菜戶部  
卽與酌處該部知道欽此欽遵合咨貴部卽將川



兵行糧葢菜銀兩速行酌處等因移會到部奉  
批新餉司查議覆俱送到司相應議覆案呈到  
部該臣等看得久衛援兵非真有吞胡之志其  
始也或餌以厚利或懾於法紀是以敵愾之氣  
不勝其飽騰之思行糧不足則索行糧月餉不  
繼則思月餉如兩浙援兵悽愴思歸之情狀溢  
於言楮如津部所云者夫浙兵行糧葢菜臣部  
按月轉發津門支給原無欠缺至於應得月糧  
該省自應念其遠戍之苦源源解給以塞其嗷

嗷待哺之餓望於臣部無與也雖浙中一次解  
銀九千七百一十七兩以作初入衛者三四五  
月之坐糧二次又解三千五百四十八兩九錢  
作續入衛者六七八月之坐糧而尚未見至此  
臣部因津部移會已先發銀五千兩通融接濟  
俟解到抵還不可謂不曲體矣不謂浙江撫臣  
陸完學具題將入援之兵額欲另行補募而以  
入衛者取餉於臣部也夫整隊而來勤

王之師也振旅而還將置之何所乎無論千里荷戈

不宜及其勇往之心若諸兵一聞此耗其歸思益有勃然不可遏者矣而誰能禦之至於川兵之餉則又有可得而言者昨臣念邊兵防衛艱辛萬狀因於行糧舊例之外量加一分不爲不優厚矣不料川兵旣支行糧妄意於薊密之月餉比例并支其驕縱之念無厭之求自無容曲徇而監軍劉可訓何乃輕爲之請也曾不思各邊月餉厚薄原自不一不得比而同之夫川兵而欲支月餉也則自有該省一定之額在是減

之而無容減亦增之而亦無容增者也監軍水  
居該省不酌其本省之餉數而輒比於別鎮恐  
求多之貪心誰不如我尤而倣之是教之亂也  
川兵自抵蜀以來向食臣部行糧今所欲開銷  
者雖係川中之餉而未始非臣部之餉且彼處  
之解銀轉盼卽盡此後之坐糧從何措處蜀在  
天末輸輓艱難萬一不繼必取償於臣部蜀撫  
已言之矣陽欲增支該省一月之餉而實欲增  
支臣部逐月之餉是臣之所大恐也竊謂川兵

行糧自應在薊鎮餉司支領無疑矣坐糧一項  
仍聽蜀撫查照該省規則續解接濟萬一不敷  
臣部或可借給以俟川中補還仍照川餉舊例  
聽新撫劉可訓酌給臣部必不敢玩法曲徇以  
開兼支登壘之例者也既各具題并咨呈前來  
相應覆

請恭候

命下臣部移文各該撫按并咨會督撫衙門遵奉施  
行崇禎三年七月十四日具

題本月十七日奉

聖旨浙蜀撥兵行糧支發責在該部月餉解給責在  
該省如有不繼通融接濟以俟解補着卽行該省  
撫臣作速措處不許推諉致悞軍需其撫鎮等官  
撫馭士卒務期恩威並著毋得但徇厚糈反啓譁  
端新撫悞寫劉可法殊欠詳慎改正行該衙門知  
道欽此

題覆邊工餉司包鳳起條議疏

題爲邊軍之工犒甚急設官之職掌宜修敬於事  
先約畧陳請懇乞

天語申飭以便遵行以課速效事專理新餉山東清  
吏司案呈崇禎三年七月初八日奉本部送戶  
科抄出本部湖廣司主事包鳳起奏前事等因  
七月初六日奉

聖旨邊工急須餉犒包鳳起特司轉輸所請諸款着  
速與覆行該部知道欽此欽遵抄出到部送司相

應議覆案呈到部該臣等看得邊工司餉一差  
果軍腹以勵子來課三月而觀厥成責任綦重  
取效綦速總之全賴此餉犒爲主耳顧糧餉有  
本折而轉運有難易何者折色取給於臣部惟  
患外解之不繼不患轉輓之不前至於本色邊  
倉焚掠已盡水陸僭運雜艱凡薊鎮一應主客  
官兵與修築班軍靡不嗷嗷待哺於本色矧從  
間關跋涉之途餽窮邊絕谷之餉能必其以時  
接濟而宿飽無虞乎是不得不嚴稽覈而勤催



督備車夫以便轉輸此主事包鳳起所以有事  
先約畧之請也然而臣部原題疏中叅皆酌議  
詳明是在二三餉司并召買推官和衷協濟殫  
力急公無作秦越之觀叅襄靡監之事可也至  
於查運務之遲速考召買之盈虛與僱覓車夫  
等項不妨相度機宜隨便酌行務要處處照管  
事事周旋毋徒以支放了事而相推諉勿藉口  
越俎侵權而辭勞怨又在包鳳起設誠而力行  
之耳設官必有廩餼今照例月支銀二千四兩

以供本官廩餼心紅紙張之費而日用有資矣

衙門必有人役今因事派定月支銀三十三兩

六錢以給書役快皂等項工食之需俱仕工犒  
銀內支銷而使令人矣工犒鹽菜需銀不一

而足除前次發過新舊餉各一萬兩給兵部差

官蔡應舉領運督撫軍前收貯薊庫聽候支放

外今又劄新舊庫共發銀三萬兩付本官於七

月十一日隨帶東行而糧餉可無乏矣錢穀之

出入甚紛幾務之關防宜飭不者恐神奸鬼賊

之徒未免有乘機假冒之弊今已給有關防庶  
本官得以藉手供職而無掣肘之虞矣既經具  
奏前來相應覆

請恭候

命下臣部移文各該衙門并本官一體遵奉施行

崇禎三年七月十九日具

題本月二十二日奉

聖旨是欽此

題覆薊鎮援兵本色水陸轉運疏

題爲薊鎮援兵日集應用本色不貲懇乞

聖明勅部措處以便轉運事專理新餉山東清吏司  
案呈崇禎三年五月十九日奉本部送恭蒙

御前發下紅本該天津督餉部院翟鳳翀題前事等  
因奉

聖旨薊鎮糧料津運不足該部卽與酌覆欽此欽遵  
蒙發到部送司又奉本部送戶科抄出督餉御  
史沈儉龍題同前事五月二十四日奉

聖旨已有旨了該部知道欽此欽遵抄出到部送司  
遵卽呈堂於五月二十七日咨令津部撥發漕  
米三千石運薊六月初五日咨發五萬石運薊  
初十日咨發一萬石運灤永又發年例邊糧二  
萬五千石復發銀二萬兩設法召買以期接濟  
仍咨令津部將原留漕米一百零六萬二千七  
石四斗零徹底清查分別運過并存剩確數以  
便覆

請去後令津部查明開咨到部奉批此數甚濇可充

薊用送司除將剩下漕米抵充海運二萬九千  
八百三十一石零呈堂咨令津部俟州縣召買  
到日卽繇水撥運薊州聽該餉司分發各路援  
兵應用外載閱督臣原疏薊鎮現在支糧官兵  
五萬二千二百餘員名每月支行糧二萬三千  
六百三十餘石而石門馬蘭玉田豐潤開平三  
屯等處之仰給於薊倉者尚未筭也且版築肇  
興需糧更急雖前此之所撥運者未必用之卽  
盡而自復一日浩費無窮相應預爲儲蓄案呈

到部該臣等看得版築繁興防兵碁布日趨  
仰給於本色者不啻十萬之衆矣嗷嗷待哺  
日不再食則饑必源源轉輸庶可少濟緩急  
用而無如漕米有限何也督臣餉臣念軍需之  
艱難所以有汲汲議留之請矣臣以從前題留  
漕米運發存留未有確數不便遽請故一面撥  
派僱運并設法召買以期接濟仍一面咨行津  
部清查米數以便覆題今據查明咨會前來臣  
請恭報發過米數而後議及截留可乎以陸運

言之據王事姬文郁冊報自本年正月二十五日接管起至六月二十二日止除繇水運薊漕門漕米三千石外共陸路運過薊州米七萬一千八百八十八石運過三河米三千七百五十四石運過寶坻米二千四百二十四石五斗又餉道張志芳自正月十四至二十四日止運過薊州米二千六百二十一石五斗運過二河米六百八十三石五斗又通州坐糧廳郎中丁沅方正二月內運過薊州米一萬三千四百八十八



七石五斗外又該應天巡撫曹文衡檄催鎮江府屬預解漕米一千五百石連耗共一千八百七十五石差千戶張大勳運供本省援兵應用近因兵撤移咨臣部查收隨批令運至河西務聽主事姬文郁以一十五百七十五石運蘄以三百石運三河此陸運過河西武清通州漕米之數也以水運言之先該天津前後督臣崔爾進翟鳳翀截收漕米一百六萬二千七石四斗二升零內除發運過關解京通并在津支給各

兵行糧共九十三萬九千一百七十六石二升  
六合九勺外共運過薊鎮米七萬三千石運過  
永灤二萬石此水運過留津漕米之數也總計  
水陸二運共運過薊鎮米一十六萬二千五百  
七十二石共運過三河米四千七百三十七石  
五斗運過寶坻米二千四百二十四石五斗共  
運過永灤米二萬石而所運薊鎮年例邊糧之  
二萬五千石不與焉此外尚存原留津米二萬  
九千八百三十一石三斗零并運官陳伸逃走

未運米九百五十二石俱留充薊門之用第  
存留漕米二萬九千八百有奇業經借發海運  
必俟外州縣解到補發恐未能咄嗟而至且數  
亦不敷則此數萬之軍兵秋冬之間枵腹可慮  
誠有不可不預爲之計者合如督臣餉臣所請  
再於新運到津漕米截留十萬石半留津門半  
貯務關以備實津應薊之需沿邊秋冬之用庶  
三軍果腹而百堵皆作矣至於料豆密霸二道  
屬派買預計豆八萬石原爲關寧之需今改薊

門之用查霸屬豆六萬石已完解過四萬六千二百四十石未完一萬三千七百六十石密屬豆二萬石已完解過一萬七千一百三十七石六斗一升未完二千八百六十二石三斗九升其間地方物力有盈縮措辦有難易臣與津部業經曲爲裁酌何迄今尚未完乎見在飛檄督催諒急公自有同心不至秦越相視倘有故意攢延者臣等必執白簡繩之斷不敢寬假也此外再不足者或再於津門設法自買或仍行各

州縣少俟秋成召買務期無悞軍興可耳既經  
會題前來相應覆

請恭候

命下臣部移文津部餉院并行霸密二道遵奉施行  
崇禎三年七月二十一日具

題本月二十七日奉

聖旨這水陸運過薊鎮及三河等處米數知道了新  
漕截留十萬石如議行霸密派買料豆未完的數  
檄督催還多方設法接濟毋悞急需欽此

覆督餉御史題襍項載入考成疏

題爲襍項載在考成省直迄無定額請乞

明旨申飭不報者嚴予之限未完者例予之罰事專  
理新餉山東清吏司察呈崇禎三年六月初六  
日奉本部送戶科抄出督餉御史沈猶龍題前  
事等因本年六月初三日奉

聖旨襍項原屬正餉定額方可按查乃各省直謔少  
駁增竟置寢閣好生違玩着各該撫按勒限催來  
奏內完欠各官着先行分別俟認冊到齊仍類恭

奏屯糧加派一體考成着嚴飭行該部知道欽此  
又該本部題爲錢糧之解額在衛部催之欠數  
在府查未據報法難久稽仰祈

勅部清查專責撫按嚴究弊端以清解運事六月二  
十七日奉

聖旨這鳳陽府屬衛所管屯掌印等官舉劾考成舊  
係何衙門職掌還查明另奏欽此欽遵通抄到部  
送司相應具覆案呈到部該臣等看得遼餉被  
入之額惟加派襍項二者而已第加派之銀截

恭程於前歲叅課於後

功令森然毫無假借是以輸將恐後關寧軍餉實  
嘉賴之至於省直襍項多寡任情十不得五徒  
懸虛數臣固有慨於曩久矣遂題令省直認定  
額數蓋欲執此以繩各官之完欠也無奈其所  
認之數與所派之數有大相徑庭者夫襍項之  
內如抽扣稅契皆已輸之民膏優免丁糧徵素  
封之宦室而典舖之稅又取富賈之餘利也俱  
非鞭扑於小民何以支調而不完推原其故率



皆有司樹德市恩或寬假不徵或那移別用致  
所認已不及所派所解又不及所認以然眉之  
軍需等道旁之築舍非得設法考成終無實濟  
臣部正欲題

請舉行而餉臣沈猶龍直以考成襍項請矣今將崇  
禎二年完欠之數謹按原疏而覆覈之如山西  
襍項認定六萬一千三百五十一兩五錢照數  
解部全完廣西襍項一半解黔一半解部認定  
四千九百兩照數解部全完山東襍項認定八

萬七千七百八十七兩六錢已完解到銀六萬  
二千七百九十兩三錢未完二萬四千九百九  
十七兩三錢福建襍項認定八萬九百二十二  
兩四錢臣部駁增尚未回報今已解到銀七萬  
七千三百三十九兩二錢廣東襍項認定六萬  
八百五十四兩二錢駁增未報今已解到銀四  
萬五千五百四十八兩九錢陝西襍項認定六  
萬六千一百三十九兩五錢駁增未報今已解  
到銀三萬一千九十五兩六錢河南襍項認定

八萬六千七百一十四兩五錢駁查回報續認  
六萬二千五百三十三兩一錢七分該省留爲  
養兵之用其前認定之數已解到一萬七千八  
十二兩八錢江西襍項認定六萬二千四百七  
十八兩三錢駁增未報今已解到銀四千四百  
五十八兩四錢浙江襍項認定二萬三千六百  
一十七兩零一分駁增回報續認六萬九千七  
十四兩六錢九分先後共認定九萬二千六百  
九十一兩七錢今已解到七千兩南直襍項揚

州府認定二萬六千三百零七兩照數解部全  
完徐州認定五千二百二十二兩七錢已完解  
到銀四千三百一十六兩三錢未完銀九百零  
六兩四錢滁州認定三千三百八十六兩一錢  
已完解到銀三千一十九兩二錢未完銀三百  
六十六兩九錢和州認定三千八百二十二兩  
三錢已完解銀三千五百六十四兩八錢未完  
銀二百五十七兩五錢淮安府認定一萬五千  
五百九十一兩四錢已完解銀九千三百四十

二兩三錢未完銀六千二百四十九兩一錢  
州府認定一萬七千四百二十四兩七錢已完

解銷銀一萬二千三百三十三兩二錢未完銀

五千九十一兩五錢鳳陽府認定三萬三千

十一兩三錢已完解銀七百四十八兩未完銀

三萬二千二百六十三兩三錢池州府認定七

千三百二十四兩四錢已完解銀四千一百九

十五兩八錢未完銀三千二十八兩六錢應天

府認定八千六百六十七兩三錢駁增未報全

已解銀八千三百五兩五錢安慶府認定八千  
四百一十九兩八錢駁增未報今已解銀七千  
八百五十三兩五錢徽州府認定一萬一千八  
百二十九兩駁增未報今已解銀二千六百五  
十一兩八錢寧國府認定一萬六百三十三兩  
三錢駁增未報今已解銀二千三百八十五兩  
一錢太平府認定二千七百五十一兩駁增未  
報今已解銷銀四千二十八兩六錢松江府認  
定八千一百八兩六錢駁增未報今已解銷銀

二千六百一十九兩常州府認定四千二百九

十兩九錢駁增未報今已解銷銀三千三百四

十五兩二錢鎮江府認定六千九百一十兩三

錢駁增未報今已解銷銀三千一百二十一兩

九錢蘇州府認定一萬五千一百四十四兩八

錢駁增未報廣德州認定一千四百八十八兩

五錢駁增未報北直襟項河間府認定一萬二

千二百五十六兩四錢照數支銷全完順德府

認定一萬一千三百九十三兩四錢照數支銷

全完大名府認定一萬三千六百六十九兩五錢照數解銷全完順天府認定一萬二千三百三十二兩四錢已完解銷銀一萬一百八十五兩五錢未完銀二千一百四十六兩九錢永平府認定五千二百八十六兩四錢已完解關銀二千六百五十七兩未完銀二千六百二十九兩四錢保定府認定一萬三千一百九十九兩四錢駁增回報續認襍支公費銀一千兩覲費銀三百兩今已支銷過銀一萬二千一百九十



九兩四錢真定府認定二萬二千四百九  
兩六錢駁增未報今已支銷過二萬二千七百  
四十五兩七錢廣平府認定一萬二千八百三  
十六兩一錢駁增回報續認襍支公費銀三百  
六十兩今已支銷過銀一萬一千七百八十七  
兩一錢延慶州認定八百七十一兩七錢照數  
解部全完保安州認定五百七十六兩七錢照  
數解部全完以上省直府州有照認定額數而  
解銷全完者則山西廣西二省與南直之揚州

一府北直之河間順德大名三府并延慶保安  
二州是也有已經認定而徵解未完者則山東  
浙江河南三省與南直之徐滁和三州并廬鳳  
淮揚池五府及北直之順永保廣四府是也有  
原認數少而駁令增認未報者則福建廣東陝  
西江西四省與南直之應安徽寧太蘇松常鎮  
九府并廣德一州及北直之真定府是也夫攝  
扣優免馬夫祗候公費原係存留銀兩此數之  
有定者也平糶稅契典舖以地方之肥瘠爲所

入之厚薄此未有定數者也年來議之者不  
拔山而增之者猶如削鐵望梅徒歎齋餅何濟  
爲今求艾之計惟有嚴考成一法而已合請

明旨申飭近者限八月終遠者限九月終未認者速  
令認定未解者速令完解務要逐州逐縣逐項  
認定如某縣某項若干某某等項總該若干首  
列經管職名備開項欵總撤冊報查考仍於

聖壽屆期之時司道將完欠各官齋冊報部以憑彙  
查舉劾再照臣部原因軍餉之不足意在多得

襍項以佐軍興故於認數稍少者卽行駁查全  
既日久不報豈以臣部爲苛求乎如果原無贏  
餘不妨據實回覆姑以原報爲額可也惟是臣  
部近修賦役全書一切工食公費等項多寡難  
以掩飾一目自可瞭然仍俟纂修完日不妨再  
行酌議加增今不得不預爲拈出者也至於叅  
罰之格宜與加派一致按所欠之券數定爲降  
革任罰以示創懲無容寬假則有司自不敢先  
彼後此而襍項之不完者鮮矣但加派出自地

畝故以十分全完爲準而襍項取之搜括量

完及九分爲準如能好義急公照數十分全完

者破格優擢卽完及九分以上者亦得免議以

示鼓舞之意若夫屯田加派俱係衛弁徵收叅

罰不及完欠自如彼寡廉鮮耻之夫何所顧忌

而肯急乃公事乎合令撫按轉行司道嚴行催

督每年於有司歲叅之外另疏查叅不完者都

司與該衛掌印官一體降罰停其陞轉管屯官

革職查有染指坐贓究罪庶貪弁知警而屯餉

易完矣及查各省屯田隸於巡屯御史然屯糧  
加派原屬遼餉則完欠自應兼聽督餉御史查  
參臣部照例覆行兵部分別勸懲以一法守者  
也再查省直督撫軍餉原派新餉共一十八萬  
一千九百餘兩巡按公費原派新餉共六萬二  
千餘兩今巡方諸臣認解者十分之七如長蘆  
巡鹽御史喻思恂極力搜括其所解者且倍原  
派之額矣督撫軍餉雖目前徵調繁興未必大  
有贏餘然查援兵入衛者亦未見動及督撫軍

餉公費而起解者何寥寥也將令原題竟成  
譚乎當此

國事多艱諒亦諸臣所不靳似當并令分別完欠

回

奏照數認解庶此項不托之空名而涓滴皆歸實  
用矣謹因覆議考成而并及之恭候

命下臣部移文各該衙門遵奉施行

崇禎三年七月二十四日具

題本月二十七日奉

聖旨新餉項原係軍興正額何得任意稽延該部  
勒限嚴催速認速解各該州縣仍將總撤款項完  
欠數目經管職名備開文冊付齎捧官報部與加  
派一體查叅其督撫軍餉巡按公費着一併催償  
至鳳陽府屬屯官舉劾考成舊係何衙門職掌有  
旨詰問如何不查明奏來欽此



題覆呂罔卿催解山東錢糧疏

題為恭報四次完解餉數以濟時艱以慰

聖懷事新舊兩餉司案呈崇禎三年六月二十九日  
奉本部送戶科抄出太僕寺添註少卿呂維寧  
題前事等因本年六月二十五日奉

聖旨呂維寧報完四次餉銀果否與派數相合着戶  
部按冊核查薦劾勤怠各官該部知道欽此欽遵  
抄出到部送司除錢糧隸兵工二部者聽該部  
查核外所有新舊餉銀相應查覆案呈到部該

奏議  
卷之二十一  
刑部  
刑部  
刑部

臣等看得二東物力一耗於蓮妖之作崇二耗於海上之轉輸兼之邇年以來荒旱浮臻杼軸其空催課之役委非易易今查寺臣呂維寧原催東省元二兩年未完新舊餉銀并三年預徵五分共該銀一百三十三萬二千餘兩先據該寺疏報應扣除舊餉壓徵銀二十四萬六千餘兩黃蠟折價災疲減等銀三千三百六十餘兩支放登餉坐留買米銀七萬八千三百九十餘兩召買遼豆用過銀三萬四千八百餘兩實該

解部銀九十六萬九千九百四十七兩續奉部  
劄東江餉銀二十四萬餘兩止准給十萬兩其  
餘十四萬五千餘兩仍令併催解部總計應解  
銀共一百一十一萬五千一百餘兩此臣部覆  
准應解之實數也今據寺臣疏開查布政司冊報崇  
禎三年新餉除東江登鎮兵餉等項動支外應  
解部銀二十三萬二千一百五十八兩零今再  
加一十四萬餘兩仍應解三十七萬有奇合照  
部劄原坐催五分止該解銀二十七萬七千八

百七十五兩零催今起解又續奉

旨開催盜課壓徵先完五分較原奉部劄減銀三萬

二千一百二十兩查出德左二衛屯糧係直隸

加派應除銀一千七百五十兩零節省裁汰兵

餉已抵補缺額之數虛懸銀三千一百六十五

兩實該催解部銀九十七萬八千六百二十六

兩有零等因及查德左二衛武定所屯糧銀一

千七百五十兩八錢東省自認冊內原有此項

何復以北直加派爲辭容臣另行藩司駁查外

歷查該寺疏報第一次差官詹豫之等解三寸  
五萬八千八百一十八兩零第二次差官趙元  
元等解一十三萬七千七百一十四兩九錢第  
三次差官王國棟解三十八萬八千二百九十  
七兩零第四次差官米賓等解一十五萬三千  
四百八十五兩零通共報解過一百三萬八千  
三百一十四兩九錢零內發東江餉銀五萬兩  
實解到部銀九十八萬八千三百一十四兩零  
通共完解過一百三萬八千三百一十四兩零

此寺臣催解過之實數也按之原催應解之數  
已逾五萬九千陸百餘兩夫承催於災疲之貧  
報竣於

欽定之限而且逾額如許若非寺臣呂維寧忠猷素  
著調停得宜曷克臻此倘寓內諸臣而盡如寺  
臣之拮据督催俾財若疏泉餉如流水則厲秣  
有資飽騰攸賴又何呼庚呼癸之足慮哉是非  
破格優擢不足以酬勞動者也然溯流窮源則  
撫按藩司諸臣之同心共濟其功亦有不可泯

者除撫臣沈珣按臣高捷藩臣陳應元鹽運司  
運使張光奎萊州府知府李鳴珂純忠體

國殫力持籌調劑於公私之間斟酌於盈虛之數  
用使百萬金錢遂能一呼嚮應前經寺臣具題  
業奉

明旨紀錄臣不敢再叙外如分守東兗道陞任帶銜  
左布政使劉榮嗣管按察司事帶銜右布政使  
焦源清分巡青州道陞任按察使柴寅賓濟寧  
兵河道見任按察使董暹武德兵備道陞任右

參政兼僉事馮任總理糧儲道見任右參政明  
一龍分守萊州道見任右參政戴君恩充西兵  
巡道見任右參政兼僉事錢時分守濟南道陞  
任副使兼右參議申紹芳清軍驛傳鹽法道見  
任副使任國禎分巡東昌道見任副使孔榮宗  
濟南兵巡道見任副使鄭崇儉以上司道一十  
二員本經邦裕

國之才敷流膏布閩之政威惠金浹轉輸爭先如  
濟南府知府宋光蘭兗州府知府劉存慧東昌



府知府葉宰青州府知府汪喬年登州府知府  
蕭魚濟南府推官劉承棠兗州府推官鄭光昌  
東昌府推官姚士鴻萊州府推官夏民仰登州  
府推官李禎曹州知州胡璉德州知州李應元  
濮州知州王廷對歷城縣知縣呂黃鍾益都縣  
知縣田首鳳堂邑縣知縣韓法愈濰縣知縣秦  
熙文登縣知縣賀王盛滕縣知縣荆爾植諸城  
縣知縣王懋學安丘縣知縣張煊滋陽縣知縣  
詹胤昌掖縣知縣洪恩炤曹縣知縣盧柱礎恩

縣知縣劉含輝陽穀縣知縣李寅宿魚臺縣知  
縣鄭滂東阿縣知縣李經世夏津縣知縣王之  
禎冠縣知縣蕭譽壽光縣知縣張弘道蓬萊縣  
知縣高鳴鳳濰川縣知縣郭永泰霑化縣知縣  
李景廉臨淄縣知縣耿胤樓卽墨縣知縣楊錫  
璜朝城縣知縣衛岑鄒縣知縣黃應祥陵縣知  
縣戴文斗昌邑縣知縣李聯芳樂陵縣知縣王  
弘譽館陶縣知縣張映日照縣知縣趙世貞博  
興縣知縣黃繪沂水縣知縣蔣希舜茌平縣知

縣姚九官泗水縣知縣李和貴萊蕪縣知縣詹  
仲單縣知縣王萬年新泰縣知縣李春萼樂安  
縣知縣高任陽信縣知縣王爾鶴范縣知縣翟  
師有高苑縣知縣王溥棲霞縣知縣李升吉觀  
城縣知縣堵應畿肥城縣知縣崔凌雲臨邑縣  
知縣黃三辰曲阜縣知縣孔弘毅壽張縣知縣  
趙灼嘉祥縣知縣施寶正定陶縣知縣杜繼李  
博平縣知縣姚世雍清平縣知縣張應選濟陽  
縣知縣熊涇嶧縣知縣薛治安莘縣知縣李蔚

華催科有法撫字多勞已奏准輸之功宜著優  
良之考以上司道并府州縣各官均當如議  
體薦揚紀錄以示激勸者也所劾新城縣知縣  
由旣庭未完銀二千五百四十餘兩相應任俸  
戴罪督征通候全完方准開復其長山縣知縣  
馬斯臧未完襍項新餉并鹽課馬價共銀六千  
六百一十九兩零前經奉

旨任俸督催近因漕輓愆期又已革職爲民無容再  
議所當勒令接管官員代爲催徵完解者也

經寺臣具題前來相應覆

請恭候

命下臣部移文該省撫按并咨吏部遵奉施行

崇禎二年七月二十六日具

題本月二十九日奉

聖旨據奏呂維寧催餉如期完數溢額勤公可嘉既  
經查明准與紀錄優叙道府州縣勤怠各官分別  
舉劾俱如議欽此

題叅霸密河南山東保河六府買豆愆期疏

題爲秋防正亟飼秣宜先謹查叅買豆愆期以肅  
功令以濟急需事專理新餉山東清吏司案呈案  
查預計崇禎三年分料豆該本部題派霸屬六  
萬石密屬二萬石原爲關寧之用嗣因薊門告  
警改充薊鎮援兵之需較之上年尤爲喫緊其  
不可泄泄從事明矣今查霸州道屬內被虜患  
州縣減買四千七百石密雲道屬內被虜患州  
縣減買二千二百石該本部發銀津部代買以

補原額亦可謂曲體民情矣州縣有司有同仇  
之誼者自宜上緊措辦及時完解而何今之不  
然也查霸州道屬除解過四萬七千三百九十  
二石三斗外尚欠七千九百七石零密雲道屬  
除解過一萬二千九百三十七石五斗外尚欠  
四千八百六十二石零又本年正月內欽奉

聖諭題派保河近京州縣買城守豆三萬石差主事  
王珍錫催買內涿州減買二千五百石房山縣  
減買九百石本部發銀補買以足原額俱已通

完又出師進勦豆一萬二千石內派通州懷柔  
豐密等州縣共九千石俱已解運薊州交納訖  
派盧龍灤州遷安買豆四千石因各邑虜患免  
買是城守出師二項料豆俱已報完矣又奉

旨派買料豆十萬石解京以廣積貯內派保河真順  
廣大六府共買豆三萬五千石解完三萬三千  
二百石未完一千八百石山東派買三萬五千  
石解完二萬八千九百六十六石未完六千三  
十四石河南派買三萬石解完二萬六千三百



一十三石零未完三千六百八十六石零俱屬  
違限相應據實具題青令該撫按備查未完州  
縣職名分別查叅等因察呈到部該臣等看得  
日者奴據遵永兵馬雲集料豆之需急如星火  
前餉臣崔爾進具題以霸密預計豆八萬石暫  
移作薊門之用那緩就急可謂得權宜之術矣  
臣部屢行檄催不啻舌敝頽禿今查霸屬原派  
六萬石未完七千九百餘石密屬原派二萬石  
未完四千八百六十餘石夫密逼近中協有震

隣之危其拮据防禦不遺餘力尚悉索敝賦而  
所欠無幾也霸乃腹裏所屬州縣多安堵無恙  
而有司求免之文日至往返支吾泄泄從事果  
同仇之義未切於衷而

功令之森嚴不足畏乎是臣所未解也至於京豆  
十萬石令河南山東并保河真順廣大六府買  
運奉有

欽限當不俟終日者今業已過限而未能如數全完  
也向者分派三省責令撫按自行攤派其州縣

應買多寡臣部無從稽查惟受其成數而已彼時該省撫臣有率兵入援者有陳師境上者移催之後或不暇及既違初定之期豈稱急公之義所當責令撫按督率司道查其完欠州縣速行督促參究者也伏乞

天語申飭容臣部轉行撫按

畿輔責成該道外省責成藩司定以嚴限務期八  
月內全完違者一併從重罰治庶人心共悚而  
軍儲攸賴矣既經該司案呈前來相應覆

請恭候

命下臣部移文各該撫按遵奉施行

崇禎三年七月二十六日具

題本月二十九日奉

聖旨料豆開軍興急需豈容玩視未完的着嚴行該撫責成司道依限速解違者叅來重處欽此

題催省直新餉完欠疏

題爲軍餉經用愈奢徵解驟急漸緩奴謀叵測儲蓄宜預伏乞

天語申飭分別責成按限速完以足

國用事專理新餉山東清吏司案呈秋防緊急外解不敷請乞具題責成催解等因到部該臣等看得善禦敵者不恃其不來而恃有以禦其來惟在廣其儲蓄有備無患已耳

國家自關寧以至薊密等鎮無日不仰給於太倉

而太倉源源之流總藉各省直爲灌輸也數  
以來軍興浩費支用者如江河之浸淫千端萬  
緒而靡有底止轉輸者如潦渚之酌挹隨取隨  
竭而日苦不足至於臣部通融會計猶如露肘  
之襟短袖之舞窘迫立見而莫能支撐方懼不  
知其所終今幸仰仗

天威奴孽遠遁謂非賴差出京卿之督催省直諸臣  
之協濟不可而臣竊凜凜者宇內大患奴急則  
我亦急奴緩則我亦緩猶恐京卿言旋之後省

直諸臣漸無未雨綢繆之思渾忘同舟共濟之  
誼撫按習於長厚而不過督有司有司徂於寬  
緩而務要譽小民此臣前不得已欲以十分錢  
糧資之京卿諸臣也伏奉

聖旨歲解餉銀責在有司各該撫按嚴限責成自應  
及額京卿係暫遣不必議留以後催徵如有延悞  
經管官必罪不宥欽此欽遵臣卽遵依飛檄移會  
業至再三想好義終事亦有司職分所宜然者  
當不俟臣詞之畢矣目今秋成屆期百姓之輸

將完納正在此際除西晉西粵新餉業已全完  
外其餘省直接以新餉五分之數尚有完有不  
完也前臣所定期限或以六閱月或以八閱月  
祇以諸臣躑

命往還道途有遠近舊逋有多寡故爲少寬其期非  
謂在再今茲猶然拘拘五分之數也倏而

聖壽屆期矣倏而入

覲述職矣

功令森嚴考成之法誰敢寬假諸臣縱不爲疆場



計安危不爲臣部計緩急寧不自爲功名計得失乎茲以各省直京卿所催新餉論之浙江元二兩年未完加派襍項共二十五萬二千一百六十八兩三年新餉五分共該銀二十五萬六千九百四十五兩尚未完銀一十六萬二千三百二十兩四錢江西元二兩年未完加派襍項共二十一萬六千七百五十八兩三年新餉五分共該銀二十一萬一千七百五十七兩尚未完銀一千四百五十一兩福建元二兩年未完

襍項銀四千二百六十兩三年新餉五分共該  
銀一十萬四千二百九十四兩尚未完銀一萬  
八千九十四兩河南崇禎二年未完襍項銀六  
萬九千六百三十一兩陝西元二兩年未完加  
派襍項銀共八萬五千六百五十五兩三年預  
徵五分共該銀十六萬四千八百八十四兩七  
錢尚未完銀一萬八千四百三十兩五錢廣東  
元二兩年未完襍項銀二萬二千四百九十五  
兩應安徽寧池太廬鳳廣德滁和十一府州元

二兩年未完加派襍項銀共九萬四千六百二十五兩三年新餉五分共該銀二十萬一千九百三十八兩九錢尚未完銀三萬六千三百五十兩七錢蘇松常鎮淮揚徐州元二兩年未完加派襍項銀共十萬六千二百六十兩七錢三年新餉五分共該銀二十二萬一千四百六十三兩尚未完銀一十七萬二千一百四十四兩以上元二兩年加派襍項共未完銀八十五萬一千八百五十二兩七錢三年預徵五分共未

完銀四十萬八千七百九十兩零雖其間有欠解在途而未至者然其數有限則京卿所催亦未遽爲滿額也斯愚臣之過慮也至於應安陝西二差京卿近報物故則接管督催自撫按事而不得遂置度外已也若夫奉

旨責成撫按督催未解新餉五分則又有可得而言者浙江該銀二十五萬六千九百四十五兩江西該銀二十一萬一千七百五十七兩福建該銀十萬四千二百九十四兩河南該銀三十三

萬六千五百四十一兩零山東該銀三十萬五  
千八百四兩零山西尚該銀二萬九千四百六  
兩八錢陝西該銀一十六萬四千八百八十四  
兩七錢廣東廣西該銀四萬六千九百三十七  
兩應安徽寧池太廬鳳廣德滁和十一府州該  
銀二十萬一千九百三十八兩九錢蘇松常鎮  
淮揚徐州該銀二十二萬一千四百六十三兩  
湖廣新改解京銀三十七萬八千兩四川新改  
解京銀一十二萬一千三百四十兩以上共未

解銀二百三十七萬九千三百一十一兩零補  
共省直加派襍項崇禎元二兩年并三年新餉  
前後各五分共未完銀三百六十三萬九千九  
百五十三兩零卽今省直如數盡輸

公家尚不足補缺額倘再悠悠忽忽照常逋欠而  
莫可誰何異日餽餉不繼將何以哺三軍而禦  
大敵乎臣竊以爲京卿承催者自應在於限內  
全完以便復

命其撫按承催者通限於十月內十分全完如有司

怠玩者俱聽京卿撫按不時叅處倘有應准買米開銷等項俟差竣限滿日無妨照例回

奏者也又查襍項款內有菑課關稅二項累年遞增新餉銀幾一百餘萬如兩淮運司崇禎元年分欠新課銀四萬兩崇禎三年分該新課八萬六千六百三十六兩二錢

大工加課改充遼餉銀七萬八千六百一十八兩七錢二分戊辰年積引銀一十四萬七千六百一十二兩三錢遼鎮天啓七年并崇禎元二年引

價銀九萬五千八百五十三兩一錢五分吉  
課銀六萬餘兩新增和合等處食塩銀二萬三  
千三百三十八兩三錢五分兩浙運司崇禎三  
年分該新課銀三萬兩

大工加課改充遼餉銀三萬一千一百三十三兩八  
錢三分福建運司崇禎二年分欠新課銀一萬  
七千三十六兩一錢五分崇禎三年該新課銀  
一萬七千三十六兩一錢五分

大工加課改充遼餉銀一千五百八十六兩八錢廣



東提舉司崇禎二年欠新課銀一萬四千兩崇禎三年分欠新課銀四萬九千六百九十六兩九錢七分

大工加課改充遼餉銀五千四百一十二兩一錢二分八山東運司崇禎二年分欠新課銀一萬一千四百零五兩一錢八分崇禎三年分新設票價銀一千五百四十五兩一錢八分遼餉銀一萬三千九百零五兩一錢八分

大工加課銀六千四百三十七兩三錢七分長蘆運

司崇禎二年分欠新課銀一萬二千三百八  
五兩五錢崇禎三年分該新課銀二萬二千二  
百八十五兩五錢又改行山東引價銀三萬六  
千八百五十八兩三錢

大工加課改充遼餉銀一萬二千一百九十四兩河  
東運司崇禎三年分該

大工加課改充遼餉銀四千四百兩陝西靈州塩課  
司崇禎三年分該

大工加課改充遼餉銀一千一百八十六兩七錢四

分以上共該新課銀八十二萬六百餘兩其間多有藉口壓徵托言新增寬限者臣部雖按年叅罰終未如額今

國事多艱尤難作等閑視之合限年終責令搢臣自行具疏回

奏如有未完亦當陳其不完之故或立限期繩以功令則運司無所辭責也其無巡鹽省分亦當責之按臣照例舉行乃若權稅關津往往稱虧蝕者豈商賈皆不真而飛無脛而走者乎今扣至

年終止各關新餉除存留買銅外北新鈔關

禎二年分欠新課銀二萬三千三百八十九兩

一錢六分崇禎三年分該新課銀二萬七千五

百兩新加銀一萬六千兩濟墅鈔關崇禎三年

分該新課銀一萬一千一百五十四兩新加銀

一萬四千八百七十五兩九江鈔關崇禎二年

分欠新課銀一萬二千三百四十三兩崇禎三

年分該新課銀二萬零四百四十兩新加銀一

萬一千五百兩淮安鈔關崇禎三年分該新課

銀一萬三千五百四十兩新加銀九千一百二十兩揚州鈔關崇禎二年分欠新課銀二千兩零三錢五分崇禎三年分該新課銀五千四百八十一兩一錢三分新加銀五千一百二十兩崇文門宣課司崇禎三年分該新課銀一萬兩臨清鈔關崇禎三年分該新加銀六千三百八十兩以上開課共銀一十八萬八千八百四十二兩六錢四分該管司官舊額新增務期全完仍以蚤晚爲殿最俟差滿日其如數而蚤完者

准復職紀錄其不完而遲至者卽分別降罰又應  
臣部自爲考成而不容寬假者也夫加派襍項  
皆小民之膏血尚且不憚敲朴益課關稅取之  
富商大賈豈容任其逋欠所當與加派雜項新  
餉一併申飭考成者也竊念臣部大聲疾呼立  
限責成幾於強聒宇內必將有以刻核罪臣者  
但臣部維正之供有司或可爲拖欠而開薊一  
定之額臣部必不能短少若責成後而能完解  
則

國事有濟卽怨臣罪臣者不妨一官謝之苟或過  
於寬容致有脫巾之變臣固無所逃於三尺而  
所誤於封疆者大矣伏乞

天語詳加申飭京卿撫按務在如期催解鹽課關稅  
務在照數考成俾臣部得以藉手接濟軍興無  
致缺額富國強兵兩有濟矣邊疆幸甚臣部幸  
甚崇禎三年七月二十八日具

題八月初一日奉

聖旨新餉責成撫按鹽課責成鹽臣務要如數徵完

依限回奏有司怠緩叅來罰治開稅該部自行考  
核俱依議行欽此